



REPUBLIKA E SHQIPËRISË

**KOMISIONERI PËR TË DREJTËN E INFORMIMIT
DHE MBROJTJEN E TË DHËNAVE PERSONALE
DREJTORIA PËR MBROJTJEN E TË DHËNAVE PERSONALE**

Nr. 1681 / prot. 3

Tiranë më 22 11.2018

VENDIM

Nr. 69, datë 22 11.2018

MBI

ZBATIMIN E LIGJIT PËR MBROJTJEN E TË DHËNAVE PERSONALE

Në mbështetje të neneve 29, 30 dhe 32 të Ligjit Nr. 9887 datë 10.03.2008 "*Për Mbrojtjen e të Dhënave Personale*", neneve 77-112 të Ligjit Nr. 44/2015 "*Kodi i Procedurave Administrative të Republikës së Shqipërisë*", Vendimit Nr. 49/2017 të Kuvendit "*Për krijimin e mekanizmit për monitorimin sistematik të ndjekjes dhe zbatimit të rekomandimeve të institucioneve të pavarura kushtetuese dhe atyre të krijuara me ligj*", si dhe provave të administruara në ngarkim të kontrolluesit "*Bashkia Lushnjë*",

KONSTATOVA SE:

Në zbatim të Urdhrit Nr. 284 datë 07.11.2018 të Komisionerit për të Drejtën e Informimit dhe Mbrojtjen e të Dhënave Personale, u krye hetim administrativ pranë kontrolluesit "*Bashkia Lushnjë*", me objekt:

- Verifikim i zbatimit të Rekomandimit Nr.11 datë 06.06.2016, Ligjit Nr. 9887 datë 10.03.2008 "*Për mbrojtjen e të dhënave personale*" dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit të kontrolluesit "*Bashkia Lushnjë*".

Komisioneri për të Drejtën e Informimit dhe Mbrojtjen e të Dhënave Personale, pasi shqyrtoi relacionin e hetimit administrativ, procesverbalin e konstatimit dhe provat e administruara gjatë ushtrimit të hetimit pranë kontrolluesit "*Bashkia Lushnjë*", konstaton se:

1. Kontrolluesi, nuk ka publikuar një rubrikë të veçantë "*politikat e privatësisë*", në zbatim të pikës së parë të Rekomandimit Nr. 11/2016 të Komisionerit. Konstatimi përbën shkelje administrative të nenit 18, pika 1, të Ligjit Nr.9887/2008 "*Për*

Mbrojtjen e të Dhënave Personale”: “Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale, për personin që do t’i përpunojë të dhënat, për mënyrën e përpunimit...”.

Informacioni i publikuar në “Politikat e Privatësisë”, duhet të ketë për qëllim informimin e subjekteve të të dhënave që vizitojnë këtë portal, mbi mënyrat e përpunimit të të dhënave, masat e sigurisë, ruajtjen e konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

2. Kontrolluesi “*Bashkia Lushnjë*”, në zbatim të nenit 21 të ligjit, ka “*Njoftuar*” Zyrën e Komisionerit në lidhje me përpunimin e të dhënave personale, megjithatë konstatohet se ky njoftim duhet përditësuar. Konstatimi përbën shkelje administrative të pikës 1 të nenit 21 dhe nenit 22 të Ligjit Nr.9887/2008 “*Për mbrojtjen e të dhënave personale*”: “...*Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji, të njoftuar më parë*”.

Në përfundim të kontrollit administrativ, referuar provave dhe konstatimeve në vend, grupi i inspektimit ka hartuar procesverbalin e datës 08.11.2018, të cilin përfaqësuesi i kontrolluesit e ka nënshkruar pa asnjë pretendimin.

Në zbatim të neneve 87-89 të Ligjit Nr. 44/2015 “*Kodi i Procedurave Administrative të Republikës së Shqipërisë*”, kontrolluesi “*Bashkia Lushnjë*” është njoftuar të marrë pjesë në seancë dëgjimore pranë ambienteve të Zyrës së Komisionerit. Kontrolluesi është paraqitur në seancë dhe ka dokumentuar marrjen e masave konkrete për rikuperimin e shkeljeve të konstatuara.

Si përfundim, shkeljet e konstatuara gjatë ushtrimit të hetimit administrativ të cilat konsistojnë në mos informimin e subjekteve mbi përpunimin e të dhënave personale në portalin www.bashkialushnje.gov.al dhe mos kryerjen e përditësimit të “*Njoftimit*” pranë Zyrës së Komisionerit, në kuptim të nenit 39, pika 1, gërmat “*b*” dhe “*d*” të Ligjit Nr.9887/2008 “*Për Mbrojtjen e të Dhënave Personale*”, përbëjnë kundërvajtje administrative dhe sanksionohet me gjobë si më poshtë:

- b) “*Kontrolluesit që nuk përmbushin detyrimin për të informuar, të përcaktuar në nenin 18 të këtij ligji, dënohen me 10.000 deri në 300.000 lekë*”;
- d) “*Kontrolluesit, që nuk përmbushin detyrimin për të njoftuar, sipas përcaktimit në nenin 21 të këtij ligji, dënohen me 10 000 deri në 500 000 lekë*”;

Në bazë të nenit 39/2 të Ligjit Nr. 9887/2008 “*Për mbrojtjen e të dhënave personale*”, për kundërvajtjet e mësipërme administrative, dënohet me dyfishin e gjobës së përcaktuar në pikën 1 të këtij neni.

Për zgjedhjen e masës së gjobës, Zyra e Komisionerit ka parasysh faktin se shkeljet e konstatuara janë serioze. Ato lidhen me garantimin e parimeve dhe përpunimin e ligjshëm të të dhënave personale.

PËR KËTO ARSYE:

Në zbatim të neneve 18, 21, 29, 30, 39 pika 1 gërmat "b" dhe "d", si dhe nenet 40 dhe 41 të Ligjit Nr. 9887 datë 10.03.2008 "Për Mbrojtjen e të Dhënave Personale",

V E N D O S A:

1. Dënimin e kontrolluesit "Bashkia Lushnjë", me gjobë në vlerën 30.000 (tridhjetëmijë) lekë për shkelje të detyrimeve të përcaktuar në nenin 18 të Ligjit Nr.9887/2008 "Për Mbrojtjen e të Dhënave Personale".
2. Dënimin e kontrolluesit "Bashkia Lushnjë", me gjobë në vlerën 20.000 (njëzetëmijë) lekë për shkelje të detyrimeve të përcaktuar në nenin 21-22 të Ligjit Nr.9887/2008 "Për Mbrojtjen e të Dhënave Personale".
3. Kontrolluesi "Bashkia Lushnjë", të respektojë kushtet dhe kriteret e përcaktuara në nenet 5 dhe 6 të Ligjit Nr.9887/2008 "Për Mbrojtjen e të Dhënave Personale" dhe Udhëzimin nr. 39/2013 të Komisionerit "Për përpunimin e të dhënave personale në regjistrat publikë" gjatë administrimit dhe publikimit të të dhënave personale që përmbajnë Vendimet e Këshillit Bashkiak, listat e personave që përfitojnë ndihmë ekonomike, listat e nxënësve që marrin bursë, listat e pagesave për personat me aftësi të kufizuar dhe shërbimet e tjera që iu ofrohen qytetarëve.
4. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij Vendimi. Me kalimin e afatit të ankimit, ky Vendim kthehet në titull ekzekutiv dhe ekzekutohet në mënyrë të detyrueshme nga Zyra e Përmbarimit.
5. Kundër këtij Vendimi mund të bëhet ankim në Gjykatën Administrative të Shkallës së Parë Tiranë, brenda 30 (tridhjetë) ditëve nga komunikimi i këtij Vendimi.

Ky vendim u shpall sot më 22.11.2018.

KOMISIONERI

Besnik Dervishi

